

Warhafftige vnd erschröckliche Zeitung von dem grausamen Feind dem  
Moscowiter

Augsburg 1563

Res/4 Eur. 339,45

urn:nbn:de:bvb:12-bsb00012172-2


VD16 W 541

Ein. 339 (45) ...

# Warhafftige vnd erschrockliche Zeitung / von dem grausamen Feind dem Moscowiter.



M. D. LXIII.



Warhafftige vnd erschreck-  
liche Zeytung / von dem grau-  
samen Feind dem  
Moscowiter.

**D**er Moscowiter ist vor  
wenigen Wochen dem Kö-  
nig von Polen in das Land  
gefallen / vnd hat ain Fes-  
tunge / Polozki / oder Ples-  
ki genant / so in Littawen/  
sechzehen Meylen von der Wilde geles-  
gen / mit grosser gewalt inn dem sechsten  
Sturm erobert / die Statt gantz vnd  
gar gleich der Erden hinweg gebrandt /  
vber zwainzig tausent Menschen jäm-  
merlich zurhacken vnd erwürgen lassen /  
Vnd ist die Tyranny nicht aufzuspre-  
chen / so er an Frauen vnd Jungfrauen  
wen / auch an jungen Kindern hat üben  
lassen Er hat inn die sechzig tausent  
A ij Menschen

Menschen / auß denen daselbst angele-  
genen vnd anstossenden Ötern inn die  
Mosche getriben / die Frauen vnd  
Jungfrauen alle entblößet / vnd also  
nacket gebunden vnd gefange hinweg  
treiben lassen / Darunder der Woywoda  
oder Hauptmann sampt seinem Weibe /  
denen er das Leben geschencket / auch  
gewesen.

Vnd ist in den selbigen Landen ain  
sollicher schrecken / das der fürnemeste  
Fürste in Littawē / Herz Nicolaus Rad-  
zauil genant / auß seinem Fürstenthum  
geflohen / vnd dasselbige gar verlassen  
hat.

Nach sollichem Sieg ist der Barba-  
rische greüwliche Feind mütiger wor-  
den / vnd eylet stracks auß ain andere  
Statt in Polen / Kioff genant / welche  
am Wasser / Borischenes genant / ge-  
legen ist / damit er den Polen des Orts /  
die

die Prouiant entziehe / vnd die armen  
Leute also weyter bezwinge / vnd in sei-  
ne Gewalt bringe.

Er hat auch also bald vierzig tau-  
sent Tatern ( denn er der selbigen sechs-  
zig tausent bey sich hat ) auß die Wil-  
de geschickt / welche auß zwölff Meyl  
wegs lang / zur Statt zu / alles mit feur  
vnd Mord verheeren vnd verwüsten.  
Der mainung / sich hernacher gleicher  
gestalt an dieselbigen Festungen zuma-  
chen.

Vnder andern erschröcklichen Zeyt-  
tungen zu entbieten / hat er dem König  
von Polen anzaygen lassen / Das er ain  
nen Todten Sarck bey sich füre / vnd  
wölle nit ehe fride halten / es were denn  
des Königs von Polen / oder sein aygen  
Haupt inn denselbigen Sarck / so von  
Silber gemacht sein soll / gelegt.

A ij Seine


Seine macht / damit er yetzo anzeu-  
het / ist vber zwaymal hundert tausent  
vnd sechzig tausent Mann.

Von disem schrecklichen Feynde  
meldet der haylige Prophet David inn  
seinen Psalmen / Vnd lasset sich ansehen  
als wurde er der sichern Welt Kütte  
sein / von der er etlich Jar her / vnbe-  
trachtet / seiner grausamen gewalt vnd  
wüterey / ist verachtet worden. Der  
Allmächtige Gott wölle jm gnädiglich  
seines wütens wehren.

Derhalben laßt vns zu Gott vnserm  
Vatter bekeren / vnd sprechen: Wir ha-  
ben gesündigt / vnrecht gethon / seind  
Gottlos gewesen / vnd abtrünnig wor-  
den. Wir seind von deinen Gebotten  
vnd Rechten gewichen / Aber du bist  
barmherzig / darumb sey vns gnedig /  
vnd straffe vns du selbs.

Vnd

Vnd dieweil wir dich erkennen / so  
übergib vns nicht den Hayden / die dich  
nicht kennen / daß sie sich nicht rühmen  
vnd sprechen: Wa ist nun ihr Gott?  
Das verleihe vns durch Ihesum Chri-  
stum deinen lieben Son / vnseren  
ainigen Mitler vnd Sea-  
ligmacher / Amen.



Getruckt zu Augspurg/  
durch Mattheum  
Francen.

Faint, illegible text at the top of the page, possibly bleed-through from the reverse side.



Faint, illegible text at the bottom of the page, possibly bleed-through from the reverse side.